



**MAMBU
MAUYAMUNA
MARUGA
GU YULU**

**Utsasola mo
ra Watson Goodman**

Sâ musumba

MAMBU MAUYAMUNA MARUGA GU YULU

Maronda ulonsa vâva “Mâmbu mauyâmuna maruga gu yulu”. Mu mugânda wuwu matsasunsa birini biMâmbu maNsâmbi. Makâtâsi re: Mavindugulu mabirini biena mabi ka gu Mâmbu maNsâmbi.

Mâmbu maNsâmbi maruga “gu yulu” na maka buedi muGUârisa mirima mibâtu babana nsála mâmbu masungama. Mutu âgâkâlula buyedi nusiisa mabi, nutsitsa Fumu Jésus Christ mutsâga-la nândi, murima wândi ukabâsa na yinyunga na polu mumbâra Fumu yâbena âkayâbana nândi. Matsasinga Fumu mu yilima gi 1937. Ubânda dikiesi diena ngu na namunyi masâmabunsa yinongu giâmi na Fumu. Gâ yu yisâmanenayobugu, buedi musinga Jésus namunyi nusunsa gitu gotsu mu Fumu. — Watson Goodman

Romains 5:8

Te Nsâmbi ârîtsiga manenu dironda diândi mumbâra vabilanga manenu bâtu bababi, Christ âfu mu manenu.

Jean 13:1

Nagi umébila Fueti Paka, Jésus âyâbanga re: Dikiesi diâmi dimapula muburuga gu tsengi yi-yi nuyenda gu Tâta. Yândi nuronda bâtu bândi bababila mu tsengi yi-yi, âronda yâwu mbili kuânga na gu disukusulu.

Apocalypse 1:5

Dikavegu bio na Jésus Christ. Yândi ra ukâtâtuli mâmbu buedi. Yândi ra umarega urâmbuga gu

difu mubébila monyu. Yândi ra fumu yibafumu batsengi yi-yi. Akârondi manenu. Vafu yândi, âyobula manenu gu mabi metu.

Jean 3:16

Mumbâra Nsâmbi âvura ronda bisi tsengi yotsu, âvega Muânândi udikika, mure wotsu una gitu mu yândi âsâkabungana, te âkabila na monyu umubu na mubu.

Jérémie 31:3

Kâla Nsâmbi âlâbana nâmi. Yândi yâre: Makârondi yu na dironda dingiensa. Dironda diena dikâtsingi mubu na mubu. Ra dibându, mu dingieba makâbélabi yu unyi.

JESUS CHRIST RA NSAMBI

Matthieu 1:22, 23

Mutu âbiga nayâmbila Nsâmbi re: Numba yigânenayâba dibâgala âkabâga dimi. Akabura muâna dibâgala. Bakaluga yândi nduga re: Emmanuël. Divindugulu re: Nsâmbi âyi netu. Mâmbu mena malâbana.

I Timothée 3:16

Gusâ mutu urungula uyâmbila re: Dyâmbu diNsâmbi sâ didinena. Alâbana mu musonyi. Dinyunyi Disungama âyâbisa re: Ayi usungama. Biânsa, bisi yulu, balâba yândi. Mâmbu mândi malonsu gu malongu motsu. Bisi tsengi yi yi yotsu babila na gitu

mu yândi. Agâbuga gu yulu gu bundumba.

Jean 14:9, 10

Jésus âyâmbila nândi re: Philippe, manâtsâgala nenu yitsingu gigimbili, te yisâmayâba ma? Wotsu umalâba ma âmalâba Tâta. Tsenyi yimayâmbila re: Ritsiga yetu Tâyi âgu? Yisayâba re: Mayi mu Tâta na Tâta âyi mu ma?

Jean 1:1 na 14

Va dibându vabila Dufi. Dufi dibila na Nsâmbi. Dufi ra Nsâmbi. Dufi dikâluga musonyi. Ditsâgala va ganagâretu. Dibâsa na dingieba na yimuânsa.

I Jean 4:15

Mutu âgâyâmbila re: Jésus ra Muâna Nsâmbi, Nsâmbi âgonâtsâgala nândi na yândi âkâguâri mu Nsâmbi.

Colossiens 2:9

Motsu maka na Nsâmbi, na bungudu, na buyedi, na dinyânga. Motsu mana Jésus mu nyuru ândi.

Esaïe 9:5

Dimaburulu muâna. Dimavegu muâna dibâgala. Akavegu dinyânga mu tsengi. Bakatsitsanga yândi Umunyi, Nga Bandongi, Nsâmbi una bungudu, Tayi mubu na mubu, na Fumu yipolu.

Luc 1:35

Giânsa âgâbusila yândi re: Dinyunyi Disungama dikaruga gu yu na bungudu buNsâmbi bukabila nâgu. Ra dibându muâna usungama ukabura yu, âkatsitsingu re: Muâna Nsâmbi.

Matthieu 17:5

Vayâmbilanga yândi, dibungi didibigila yâwu. Bayulu dufi gu gâra dibungi diyâmbila re: Wuwu ra muânâmi. Makârondi yândi. Yululuânu yândi.

Jésus âyâmbila nândi re: Mara nsila na yimuânsa na monyu. Gusândi mutu ukavioga gu Tâta vengu gu ma. — Jean 14:6

JESUS MUANA NSAMBI

Jean 13:13

Yenu dikâtsitsi ma re: Mulonsi na Fumu. Yenu dikâyâmbili buedi mumbâra mara Mulonsi. Mara Fumu.

Jean 10:7

Jésus âbeyâmbila yâwu re: Nungiensa mayâmbila yenu re: Mara muna uyivânga gimandomba.

Jean 6:35

Jésus âyâmbila yâwu re: Mara dipe dimonyu. Wotsu uguitsa gu ma, âsâkalâba nsâla. Wotsu una gitu mu ma, âsâkayulu yibuila.

Jean 11:25

Jésus âyâmbila yândi re: Mara nga monyu. Marungula urâ-

mbusa bâtu gu difu. Wotsu una gitu mu ma, âkabila na monyu nisi âmafu.

Jean 9:5

Vaki ma mu tsengi yiyi, mara yivela gitsengi yiyi yotsu.

Jean 8:23

Ayâmbila yâwu re: Yenu bisi tsi yiyi. Ma muisi yulu. Yenu bisi tsengi yiyi. Masâ muisi tsengi yiyi.

Jean 8:58

Jésus âgâbusila yâwu re: Nungiensa mayâmbila yenu re: Abraham âmbésâmanéburu, mabi vâna.

Matthieu 14:19-21

Ayâmbila bâtu botsu re: Tsâgalânu. Abonga mape marânu na bibera bibeyi. Abemina gu yulu. Agâbusa dinyi gu Nsâmbi. Koravâna âtâbula mape. Avega bayikitsi mugâbila bâtu botsu. Bâtu botsu bayí. Bakola. Babâsa digumi na bieva bibeyi mu birini bisâlila. Babayí babila tosini yirânu tsibabâgala. Bagietu na bââna basatâla.

Luc 5:5,6

Simon âgâbusila yândi re: Mâlonsi, yetu dimadyânsa dibâti diotsu. Disâdila. Mu dufi diâgu makavera disinga. Yâwu nuvera ma-

singa, baboka mbili bibera. Massinga mâwu mabâânda kâkuga.

Matthieu 20:30 na 34

Vabila bâtu babeyi banga pâfu. Babilanga matsâgala va tungu nsila. Vayulu yâwu re: Jésus âkavioga, babuâmuga re: Mâlonsi, ndândi David, lâba yetu dingieba. Jésus âlâba yâwu dingieba. Agângila yâwu mu misu. Vâna na vâna bâtu bena babeyi babeluga. Balânda yândi.

Matthieu 21:19

Alâba muiri ufuigi. Vayenda yândi nava mbâra muiri usabila ubura. Ayâmbila re: Muiri wuwu usâkabébura. Muiri uyumuga vâna na vâna.

6 JESUS CHRIST RA MUKUNTSI NA FUMU

Colossiens 1:16

Bivâva biotsu bikunsu nândi.
Biotsu bigu yulu na bigu tsi, biotsu bikâlâbani na bisâkâlâbani, nisi bufumu, nisi manyânga, nisi buvunda na bungudu, biotsu bikunsu nândi.

Actes 2:36

Bâtu botsu balsraël bayâbi nungiensa re: Nsâmbi âsola Jésus mubila Fumu na Christ. Ra Jésus ena ugolina yenu mu kurusu.

Romains 14:9

Christ âfu na ârâmbuga gu difu mure âbili Fumu yibabafu na babamonyu.

Hébreux 1:2

Te mu dikiesi didi, âmayâmbila manenu mu muânândi. Ra yâ nândi, Nsâmbi âkunsa yulu na tsi. Ra yândi usolu na Nsâmbi mukiela bivâva biotsu.

Jean 1:3

Dufi dikunsa bivâva biotsu. Mu bivâva biotsu bikunsu gusbila yivâva nisi gimosi gisâkunsu nândi.

I Corinthiens 1:9

Nsâmbi âsâkâtsimbu bandâgi tsisiisa yândi gu bâtu. Ra yândi utsatsitsa yenu mbila munonga na muânândi, Fumu etu Jésus Christ.

JESUS CHRIST RA YIVOVI GIBOTSU

7

Romains 14:10

Yu, mugi yigonatsundisa muâna nguâgu? Na yu, mugi yigonalensa muâna nguâgu? Manenu botsu dikatelama va wusu Nsâmbi mutsundusu.

Matthieu 25:32

Bâtu bamalongu motsu babilâva wusu ândi. Akagâba yâwu makâbu mabeyi nakâvâgi babakâkieli batâba. Bakâsunsi mandomba giâwu yitsiga, bakângi giâwu yitsiga.

Actes 10:42

Jésus âruma yetu mulonsa bâtu re: Ra yândi uvegu dinyânga na Nsâmbi mutsundisa baba monyu na babafu.

Jean 5:22

Tâta âsâkâtsundisi mutu, te âvega ma, muânândi, mutsundisa botsu.

Romains 2:16

Motsu mana makalâbana mu wisi umutsundu. Nsâmbi mu Jésus Christ âkatsundisa motsu magu disuela gu mirima mibâtu. Dittendu nâna gu Mâmbu maNsâmbi nakâlonsi ma.

II Timothée 4:1

Magonaruma yu va wusu Nsâmbi na va wusu Jésus Christ uka-tsundisa baba monyu na babafu vakaruga yândi mu bufumu buândi.

MUYOBUGU KA MU CHRIST

Actes 4:12

Gusâ muyobulitsi ususu mumbâra gusâ mutu ususu uvegu va ganagâra bâtu mu tsi mure manenu diyobugi.

Jean 10:9

Mara muna yivânga. Mutu âgânyingana mu ma, âkayobulu. Akanyingananga, âkapulanga. Akadilanga kura.

Hébreux 5:9

Vaguârila yândi mu maguga motsu, âvegu miula. Koravâna mu yândi, botsu babakayululu yândi bakayobulu mubu na mubu.

Hébreux 7:25

Ra dibându Jésus âkayobula yâwu babakagogula gu Nsâmbi

mu yândi, mumbâra âyi monyu umubu na mubu musâmbila mu yâwu.

Jean 14:6

Jésus âyâmbila nândi re: Mara nsila na yimuânsa na monyu. Gusândi mutu ukavioga gu Tâta vengu gu ma.

Jean 8:24

Ra dibându matsayâmbila yenu re: Dikafu mu mabi menu. Mumbâra gâ yenu disâna gitu mu ma, dikafu mu mabi menu.

Romains 3:24

Nsâmbi mu dingieba diândi âsâkâvâni si bâtu mu mâmbu mâwu, te âkâsungigi yâwu mu Jésus Christ ukâyobuli yâwu.

I Corinthiens 1:30

Diyi bâtu baNsâmbi mu bungudu buJésus Christ. Dina buyedi ka mu yândi. Divegu milunga ka mu yândi. Dironda digâdinyi diyâgusunu ka mu yândi. Diyobulu ka mu yândi.

Colossiens 1:12-14

Gâbusânu dinyi gu Nsâmbi na yinyunga, mumbâra âmasingisa re: Diyi bayelamina mugâbana mikuânyi miândi. Agonakiela mio gu bâtu bândi babasungama babakabila gu bufumu buyivela. Amapunsa manenu gu bungudu budivisama. Amasunsa manenu gu bufumu bumuânândi ukârondi yândi. Ra mu muânândi dimayo-

bulu na dimasingulu kokolu mu mabi metu.

Tite 2:14

Avega nyuru ândi yâbena mu manenu mure diyobulu mu mabi metu motsu, mure dibili bâtu bândi bayâpinsa, na mure dibili bâtu basungama na babamarâgama muvâga mâmbu mamanyi.

Apocalypse 5:9

Bayimba dimbu dimona. Yâwu re: Yika uyelamina mubonga mugânda na mudibula wo, mumbâra yiboku. Mu difu diâgu yiyo bulila Nsâmbi bâtu mu bibându biotsu, mu mufi motsu, mu malongu motsu, na mu batsengi tsotsu.

Romains 5:9

Dimamâna lunsu na malúngu mândi, kâgu dimayobulu nândi. Disâkabélâbu kâbu na Nsâmbi.

Ephésiens 1:7

Mu difu diChrist dimayobulu na dimasingulu kokolu mu mabi metu. Nâna Nsâmbi âlonsa manenu munóngu umunyi udingieba diândi.

Hébreux 9:14

Gâ malúngu manyâma mana muâ tsongu, tsongu yimalúngu maChrist yitsaviogilila. Mu bungudu buDinyunyi dimubu na mubu, âvega yâbena gâ dilâgu didinyi gu Nsâmbi. Malúngu mândi makâretsi mirima mimanenu mu

mâmbu magána tsongu mure dirungula udyânsila Nsâmbi Monyu.

I Jean 1:7

Gâ diguenda mu yivela gâ na yâbena mu yivela, dina yinongu nândi. Malúngu mamuânândi, Jésus, makâfungi manenu mabi motsu.

I Pierre 1:18, 19

Yenu diyâtsi nayobulu yenu gu bifu bigâna tsongu bilonsu yenu na batâyi benu. Yenu dimayobulu na bivâva bigâna tsongu yingiensa gâ lora vo badola? E-e, yenu dimayobulu mu dyâmbu didilâgu didinyi diChrist. Abila gâ muâna mandomba umunyi.

Romains 5:1

Vadimasungama mu gitu, dikoka na polu na Nsâmbi mu Fumu etu Jésus Christ.

Galates 5:6

Mumbâra mu Jésus Christ nisi ugieru nisi ugágieru sâ dyâmbu, te nda mubila na gitu na dironda.

I Jean 5:4

Pâsi muâna Nsâmbi ârungula uviogilila bungudu butsengi yiyi. Ra gitu gietu gikâvegi manenu bungudu bu uviogilila tsengi yiyi.

Ephésiens 2:8, 9

Yenu diyobulu ka mu dingieba mubila na gitu. Nisi gitu gisâkâ-

rugi gu yenu. Nsâmbi âkâvegi gio ka uvega. Sâga muvâga mâmbu mamanyi, mure mutu âkoranye-muga.

Jean 20:30

Te mâmbu mâma matendu mure yenu dibili na gitu re: Jésus ra Christ yimuâna Nsâmbi. Na gitu gienâ yenu dikabila na monyu.

Jean 6:28, 29

Bayubula yândi re: A divâgi nda gi muvâga mâmbu naronda Nsâmbi? Jésus âgâbusila yâwu re: Muvâga naronda Nsâmbi ra mubila na gitu mu ma usindiga yândi.

Psaume 103:11 na 17

Yulu yikavâla na tsi, munóngu umosi dingieba diândi dika didinena gu yâwu babakâgobisi yândi. Dingieba diNsâmbi dikâtsingi mubu na mubu mu yâwu babakâgobisi yândi, nisi gu bandândi bâwu.

Psaume 108:5

Dingieba diâgu ditsaviogiliña nisi gu yulu. Dironda diâgu dikâpuli na gu dibungi.

Michée 7:18

Guyi Nsâmbi yîsusu gâ yu? Yikâsingili bâtu kokolu. Yikâtsimbu mabi mabâtu bâgu babamasââ-

la. Yisâkâbi na kâbu mubu na mubu mumbâra yikârondi ulâba bâtu dingieba.

Lamentations 3:22, 23

Dingieba diNsâmbi disâkavu. Disâna disukusulu. Dikâfuni na yipâli giotsu. A munóngu Nsâmbi! Yisâkâlibani.

Tite 3:5

Ayobula manenu sâga mu mambu mamanyi mavâganga manenu, te nda mu dingieba diândi. Vamayobulu manenu, dimadila batema yidinyunyi mulonsa re: Dina monyu umona. Ra Dinyunyi Disungama ukâkâlusî manenu.

Esaïe 55:1

Mutu wotsu ugonayulu yibuila, ârugi nagu mâmba. Nisi yândi usâna badola. Rugânu tsisumbiânu. Yângânu. Rugânu tsisumbiânu malâmu na dilait guga badola, gugâ difunu.

Apocalypse 22:17

Dinyunyi na dibundu, yâwure: Ruga. Mutu wotsu ugonayulu, âyâmbili re: Ruga. Wotsu unâyulu yibuila, ârugi. Wotsu una nsâla mâmبا mamonyu, âbongi mo gugâvega badola.

II Timothée 1:9

Ra yândi uyobula manenu na yândi ra utsitsa manenu mubila

bâtu bândi. Asavâga nâna mu dyâmbu dimâmbu maditsavâga te nda natsagâna yândi mu dingieba diândi nagi unékunsa yândi tsengi.

Matthieu 11:28

Rugânu gu ma yenu botsu badigonalâba pága na mifuna. Makasunsa mirima mienu.

Esaïe 1:18

Nsâmbi yâre: Rugânu, tâbulânu dyâmbu. Nisi mabi menu maka gâ munguli, makabila mafuga gâ dibungi. Nisi mabi menu maka mapinda gâ batsâfu, maka-kâluga mafuga na vé.

Romains 8:14, 15

Botsu babakâvâgi narumu yâ-wu na Dinyunyi Disungama ra bââna baNsâmbi. Yenu disâve-gu matâsa mabuviga mulâba woma, te Dinyunyi dika nenu, âkâ-kâlusi yenu bââna baNsâmbi mu-re dirungula urâpila Nsâmbi re: Tâta.

Philippiens 2:15

Ra dibându yenu dikabila bââ-na baNsâmbi basungama baba-gâ na mbela va ganagâra bâtu bababi batsengi yi. Gâbânu tsângu yimonyu nâwu. Bilânu va ganagâra bâtu bena munóngu umosi gâ banyetsa.

I Jean 3:10

Yâbânu, gusâ pága muyâba re: Bâba ra bââna baNsâmbi na bana ra bââna baDyâbara. Wo-tsu usâkâvâgi mâmbu masunga-ma na wotsu usâkârondi mbâtsi ândi, yândi sâ muâna Nsâmbi.

II Corinthiens 6:17, 18

Ra dibându Fumu yâre: Yenu buedi disiisi yâwu. Buedi mu-buruga va ganagârâwu. Sâ buedi nisi mugogula gu mâmbu magâmanyi. Koravâna makasângila yenu. Fumu yina bungudu bungiensa yâre: Makabila Tâyenu. Yenu dikabila bââna bâmi baba-bâgala na bagietu.

BANDONGI TSINSAMBI MU DYAMBU DIMALAMU 15

Romains 13:13, 14

Dibiliânu na bitsâgalitsi biblyi biyivela. Siisânu bibengunu bigâbinyi, na dilângi, na butsuâri, na ubila na yilâmba, na uvâgana, na diguâvi. Duârânu monyu umona gâ yiduâri mu Fumu Jésus Christ. Diyágâbuga mudungumusu na mâmbu makârondi bâtu.

Galates 5:19-21

Diyâtsi mâmbu mayenu bena na vela. Mâmbu mena ra uvâga butsuâri, na ubila na matâsa mabuânsi, na uvâga yikânsi gigâginyi, na ugitsa bambumba, na uvâga biviva, na uvâga bungânga, na ubila na yibena, na uvâ-

gana, na ubila na ngusu, na ulâba kâbu, na uvâga mitsuâku, na urimbula, na uputasana mâmbu maNsâmbi mamosi na mâmbu mabâtu mudungimisa bambâtsi, na ubila na diguâvi, na ubila na dilângi, na ubila na munsunsu, na uvâga mâmbu masusu mamunóngu wena. Mamâna yâmbila na mabéyâmbila yenu re: Wotsu ukâvâgi mâmbu mena, âsâkaputasana mu yitsuku giNsâmbi.

Proverbes 23:31, 32

Yiyâbemina malâmu, nisi mabenga mamanyi, nisi maka na difuitsi. Disukusulu dimo ra munóngu umosi gâ yimakâgu na mbisi.

Jésus âgâbusila yândi re: Ronda Fumu âgu Nsâmbi na muri-ma umosi. Ra dyâmbu dimarega. Ra dyâmbu ditsaviogilila mâmbu motsu. — Matthieu 22:37, 38

Marc 10:17-22

Mutu wena âyubula Jésus re: Mulonsi umunyi, mavâgi nda tse-nyi mudila monyu umubu na mubu? Jésus âgâbusila yândi re: Yimatsitsa ma mulonsi umunyi nda mugi? Gusândi mutu umunyi vengu Nsâmbi yâpinsa. Yiyâtsi migiela miNsâmbi re: Yiyâboka mutu. Yiyâvâga butsuâri. Yiyâyi-ba. Yiyâfurigila mbâtsi dyâmbu. Yiyâvâga bitula. Gobisa tâyâgu na nguâgu. Agâbusila yândi re:

Mulonsi, ubâânda vabânguga ma, makâkieli migiela mienâ miotsu. Jésus âbemina yândi na âronda yândi. Koravâna âyâmbila yândi re: Yigonabunu dyâmbu dimosi. Yenda muyesumbisa biotsu binâ-gu. Badola tsikadila yu mu bio, vega gu bivâsi na yikadila mu-senda gu yulu. Koravâna ruga. Lânda ma. Dibâgala diena âlâba pága mu mâmbu mena. Ayenda na nyuru yotsu yivola mumbâra âbila na mbili bivâva bina tsongu yingensa.

Proverbes 16:25

Guyi nsila bâtu bakâtâsi re: Nsila yiyyinyi, kâgu nda nsila yikâyendi gu difu.

Jacques 1:22

Kielânu bandongi, sâka muyulu pinsa. Diyâdungumusu mutâsa mâmbu maufura.

Ephésiens 5:6

Diyâdungumusu na mâmbu magâna tsongu nakâyâmbili bâtu. Ra mu mâmbu mena bâtu bakâbusi Nsâmbi. Yândi âkâlâbi yâwu kâbu mu mo.

I Corinthiens 6:9, 10

Yenu disayâba re: Babakâvâgi mâmbu magâmânyi basâkadila mikuânyi miNsâmbi gu yulu? Diyâdungumusu. Babakâyâmbili mâmbu magâmânyi na babakâgitsi bambumba, na banga bu-tsuâri, na babakâvâgi mâmbu ma-

giâyugu, na banga yiba, na banga nyima, na babakâlângi na malâmu, na babakâsengi bambâtsi, na banga mbâbu, basâkadila mikuânyi miNsâmbi gu yulu.

Bââna bâmi, diyâdungumusu na pâsi mutu. Wotsu ukâvâgi mâmbu masungama ra mutu usungama munóngu umosi na Jésus Christ ra usungama. Wotsu ukâvâgi mabi ra mutu uDyâbâra mu-mbâra Dyâbara âvâganga mabi ubâânda va dibându. Muâna Nsâmbi âruga mure digânu di-Dyâbara dikavu. — I Jean 3:7, 8

Gâ mutu âtâsa re: Ma mutu umunena te âsâ umunena, âgo-ndega nyuru ândi. —Galates 6:3

DIFU DIRUGA MU MABI

Romains 5:12

Ra dibându mabi madugulu gu bâtu botsu ka mu mutu umosi. Mu mabi, difu didugulu gu bâtu botsu mumbâra botsu bavâga mabi.

Luc 15:32

Te dyâmbu didinyi mulâba buedi na mulâba unyi, mumbâra muâna nguâgu âbetsi gâ mutu umafu. Amitsa mubila monyu. Atsiemuga. Amabélâbana.

Proverbes 11:19

Mâmbu masungama makâyensi mutu gu monyu, te mâmbu magâmânyi makâyensi mutu gu bungana.

Jacques 1:15

Disukusulu dimabi ra difu.

Romains 8:6

Matâsa magâmânyi nakânyimi nyuru enu makâboki, te matâsa maDinyunyi makâvegi monyu na polu.

Ezéchiel 18:20

Mutu ukâvâgi mabi, âkafu. Muâna âsâkabonga mbela yitâyândi na tâyi âsâkayâgula mu mbela yimuânândi. Mâmbu masungama mavâganga mutu umuniyi makalânda yândi. Mâmbu magâmânyi mamutu umubi makâtârama nândi.

Luc 7:14, 15

Agogula. Agângila mukuângu.
Babanângula fumbi batelama.
Ayâmbila re: Mufudu, râmbuga.
Fumbi ârâmbuga. Atsâgala. A-
bânda yâmbila.

I Corinthiens 15:25, 26

Buedi Christ âbili na dinyâ-
nga kuânga navakamâna Nsâ-
mbi utsârila bakolitsi bândi bo-
tsu. Difu ra mukolitsi umunena.
Christ âkasukisa bunga difu.

Jean 11:43, 44

Va mâna yândi uyâmbila nâna,
âbuâmuga na dufi didinena re:
Lazare, pula. Fumbi yipula. Bio-
ru na miogu bibila bitungu na

babânda na wusu ândi ubila upi-
tu na tsânda. Jésus âyâmbila nâ-
wu re: Nyângulânu yândi. Aye-
ndingi.

Jean 10:17, 18

Tâta âkârondi ma mumbâra
makafu mure makabégâbuga monyu.
Gusândi mutu ukadumba
ma wo, te makafu mabena. Mana
bungudu mufu, na mana bungu-
du mubégâbuga monyu. Nâna ra
narumu ma na Tâta.

Apocalypse 1:18

Mayi monyu. Mara ufu. Mayi
monyu mubu na mubu. Mara una
misâpi midifu na mimbâwu yigá-
tsima.

Deutéronome 5:7-21

Yiyâbila na bambumba va wusu âmi.

Yiyâvâla yigolani nisi yibâgunu giyivâva gigu yulu nisi gi-va tsi nisi gigu mâmba. Yiyâgu-dama va wusu bio. Yiyâgitsa bio.

Yiyâtuba dina diFumu âgu Yâve giâyugu. Fumu âkakilisa yândi ukâtubi dina diândi giâyugu.

Yiyâtsimbu mukiela wisi uloga. Buedi mudyânsa mu tsufu yi-sâmunu mumâna madyânsa mâgu motsu. Mu wisi utsâambu yi-kalooga.

Gitsa tâyi na ngûyi narumu

yu na Fumu âgu Nsâmbi.

Yiyâboka.

Yiyâvâga butsuâri.

Yiyâyiba.

Yiyâfurigila mbâtsi âgu.

Yiyânyima ndâgu mbâtsi âgu. Yiyânyima mugâtsi umbâtsi âgu, nisi mudyânsitsi wândi udibâga-la nisi mudyânsitsi wândi umugietu, nisi yibodu giândi, nisi yi-vâva giotsu gimbâtsi.

Jean 13:34

Malonga yenu ndongi yimona re: Rondanânu yenu na yenu. Na-va maronda yenu, yenu gândi, rondanânu yenu na yenu.

Psaume 139:8 na 12

Gâ mamâka gu yulu, yika vâna. Gâ masunda gu yitsiga giba-bafu, yika vâna. Nisi bilunsa bisâna divisama va wusu âgu. Dibâti dika gâ wisi na divisama gâ yivela.

Jérémie 23:24

Nsâmbi yâre: Mutu nyi âka-suema gu yitsiga gigáyâba ma? Masâkalâba yândi? Masâ gu bitsiga biotsu biyulu na tsi?

Job 34:21, 22

Nsâmbi âkâlâbi bitsâgalitsi bibâtu botsu. Akâlâbi gukâyendi yâwu. Gusândi yisuemulu va wusu Nsâmbi gu bâtu babakâvâgi

mabi, nisi gu divisama, nisi gu difu.

Luc 8:17

Yivâva giotsu gisuegu gikalâba-na. Dyâmbu diotsu diyâmbulu gu disuela dikayâbunu.

Proverbes 15:3

Misu maNsâmbi maka gu tse-nigi yotsu. Akâlâbi na bababi na babanyi.

Hébreux 4:13

Gusâ disuga musuega dyâmbu va misu maNsâmbi. Biotsu biku-nsu nândi bika na vela va wusu ândi. Mu mâmbu metu motsu dikayâgula va wusu ândi.

BANGA MABI BAKAKILUSU MUBU

Psaume 9:18

Bâtu bababi bakâyendi gu yitsiga gimaguga. Batsengi tsiotsu tsikâlibani Nsâmbi, munóngu umosi.

Matthieu 13:41, 42

Ma Muâna mutu makasindiga biânsa biâmi mutsula babakâdungimisi bâtu na bâtu babakâvâgi mabi va mbâra bâana bâmi. Bakavera yâwu gu mbâwu yiyinena. Guna gukabila bakondu na uguerisa minu.

Matthieu 18:8

Gâ gogu wâgu umatsimbusu yu, tâbula wo nuvera. Gâ gioru giâgu gimatsimbusu yu, tâbula gio nuvera gu vâla. Nisi yitsaye-

nda gu monyu na gioru gimosi vo na gogu utâbuga, ka buedi. Mubila na bioru biotsu na mogu miotsu mibeyi nuveru gu mbâwu yigâtsima sâ buedi.

II Pierre 3:7

Namunyi Nsâmbi na dufi diândi âgonakiela yulu na tsi. Agonakiela bio ngu na wisi ukatsundusu bâtu bababi na bakayenda gu bungana. Koravâna âkabunga yulu na tsi na mbâwu.

Matthieu 25:46

Bâtu bena ra babakilusu mubu na mubu, te bâtu basungama bakayenda gu monyu umubu na mubu.

Romains 14:12

Munóngu umosi, mutu mutu âkayâmbila Nsâmbi ka mâmbu mayâbena.

Actes 17:31

Akunsa wisi ukatsundisa yândi bâtu batsengi yotsu. Mutu usola yândi âkapâsa mâmbu buedi. Ayâbisa botsu dyâmbu diena varâmbusa yândi mutu wena gu difu mubébila monyu.

II Peirre 2:9

Kâgu Fumu âsatsimbu disuga diuvâtisa yâwu gu dimângu babakâguâri mu yândi. Ayâtsi gândi ukiela ba! bi ngu na wisi umutsundu vakakilusu yâwu.

I Jean 4:17

Didi dikâlonsi re: Dironda dimanenu dika didinyi. Gâ diyi wera Jésus Christ gu tsengi yi, dikabila gugâ woma vo tsonyi mu wisi umutsundu.

Hébreux 9:27

Bâtu botsu bakâfu dikiesi dimosi, koravâna bakatsundusu na Nsâmbi.

II Corinthiens 5:10

Manenu botsu dikatelama va wusu Christ mutsundusu nândi. Mutu wotsu âkavegu munóngu umosi navâga yândi va bila yândi mu nyuru ândi, gâ nda manyi vo nda mamabi.

DINGIEBA DIJESUS CHRIST

Mbela yi Adam yisaviogilila dingieba diNsâmbi unena. Nungie-nsa bambili bamafu mu dyâmbu dimbela yimutu wena umosi, te dironda diNsâmbi dimaviogilila unena. Nsâmbi âsindiga mutu umosi, Jésus Christ. Navega Nsâmbi mutu wena gu bâtu botsu ra dyâmbu didinena. — Romans 5:15

I Pierre 5:5

Ditendu gu Mâmbu maNsâmbi re: Nsâmbi âkâkoli botsu babakâmâkisi manyuru, te âkâsunsi miula gu yâwu babagâ na nyemu.

Romains 9:16

Dyâmbu diena disâna mutu, nisi gâ âronda vo gâ âyeliga na bungudu buândi. Dyâmbu die-

na dika na Nsâmbi pinsa naronda yândi ulâba dingieba.

Actes 4:33

Bakima bayâmbila bumuenyi na bungudu. Bayâmbila natsarâmbuga Jésus gu difu. Miula mi-Nsâmbi mibila nâwu botsu.

II Corinthiens 9:15

Digitsi Nsâmbi mumbâra navega yândi muânândi ra dyâmbu didinena. Disarungula usupula munóngu udironda diNsâmbi.

Yenu disâtsimbu na dironda diFumu etu, Jésus Christ. Abila yikiti te âsinga mubila yivâsi mu yenu. Asinga nâna mure yenu dikadila miula. — II Corinthiens 8:9

Actes 17:30

Nsâmbi âvura minila bâtu mâmbu mu dikiesi dikâla, te nampâpa âgonaruma botsu mu bitsiga biotsu mukâlula buyedi.

Luc 13:3

Mayâmbila yenu re: Sâ nâna. Te gâ yenu disakâlula buyedi, yenu dikabungana munóngu umosi.

Actes 3:19

Kâgu singânu mabi menu nukâlula buyedi mure mabi menu maburugi. Koravâna yenu dika bila na mirima misunda.

II Corinthiens 7:10

Mulâba pága vakâsembu yenu na Nsâmbi ra dyâmbu didinyi.

Mulâ pága nâna, yenu dikasinga mabi menu nusiisa mo. Nâna sâra buedi? Bâtu batsengi yiyi bakâlâbi pága gândi, te págena yi-sâkâyâmuni yâwu, yikayensi yâwu gu difu.

Actes 2:38

Pierre âyâmbila yâwu re: Singânu mabi menu. Mutu mutu âbâtsu mu nduga yijésus Christ mure âsingulu kokolu. Koravâna yenu dikavegu Dinyunyi Disungama.

Matthieu 3:2

Alonsanga re: Kâlulânu buyedi mumbâra Fumu yulu âsâkatsinga nuruga mukiela yenu.

Ezéchiel 18:21

Mutu umubi gâ âsiisa mabi mândi motsu nukiela migiela miâmi, gâ âvâganga ka mâmbu manyi na masungama, âkabila monyu. Asâkafu.

Apocalypse 3:20

Yuluânu, maka va mura ndâgu nudukisa va giâbutsu. Ukayulu dufi diâmi, âtsibulili ma. Makanyingana gu yândi na manândi dikayí kura.

Esaïe 55:7

Mutu umubi âsiisi bitsâgalitsi biândi. Nga mabi âsiisi matâsa mândi. Agâbugi gu Nsâmbi ukalâba yândi dingieba. Agâbugi gu

Nsâmbi etu usâkâkoli musingila bâtu kokolu.

Actes 5:31

Nsâmbi âsunsa yândi gu tselu yimabâgala mândi mubila Fumu na Muyobulitsi. Avâga nâna mure bisi Israël bakâluli buyedi. Akasingila yâwu kokolu mu mabi mâwu.

Marc 2:5

Jésus nulâba gitu gibâtu be-na, âyâmbila na yikâta re: Muâ-nâmi, mabi mâgu mamasingulu kokolu.

Matthieu 6:14

Yenu gâ disingila bambâtsi kokolu, Tayenu yigu yulu âkasingila yenu kokolu.

Colossiens 3:2

Rondânu mâmbu magu yulu sâga magu tsî.

Tite 2:11, 12

Nsâmbi âlonsa na dironda diândi. Mu dironda diena bâtu botsu barungula uyobugu. Mu dio âgonalonsa manenu mubusa bifubigâbinyi na mâmbu matsengi yiyi. Agonalonsa manenu mutsâgala na buyedi na mubila babanyi na basungama mu tsengi yiyi.

Ephésiens 5:11

Diyâputagana na mâmbu madivisama magâna tsongu. Buedi musupula mâmbu mena gu yivela.

Esaïe 1:16

Builânu. Bilânu gugâ bambindu. Burulânu mabi menu va wusu misu mâmi. Diyâbêvâga mâmbu magâmanyi.

I Jean 2:15, 16

Diyâronda tsengi yiyi nisi bivâva bitsengi yiyi. Gâ mutu âronda tsengi yiyi, âsâna dironda diTâta Nsâmbi. Mumbâra motsu mamu tsengi yiyi — nakâlâbi bâtu nsála muvâga mâmbu, nakânyimi bâtu bivâva na misu, nakâmâkisi bâtu manyuru — mâmbu mena motsu masâkârugui gumbuga Nsâmbi, te ka mâmbu matsengi yiyi.

DIBURU DIMONA**Ezéchiel 36:26**

Makavega yu murima umona. Makasunsa dinyunyi dimona gu gârâgu. Makaburula murima ugâ dimânyi nuvega yu murima umusonyi.

I Jean 2:29

Gâ yiyâtsi re: Yândi ra usungama, yiyâtsi gândi re: Mutu wotsu ukâvâgi mâmbu masungama ra muânândi.

II Corinthiens 5:17

Mutu wotsu uyi mu Christ ra mutu umona. Bifu biândi bikâla, âsâkabévâga bio. Bifu biândi bio-tsu koka bimona.

I Jean 5:18

Diyâtsi re: Mutu Nsâmbi âsakonda vâganga mabi. Muâna Nsâmbi âgonakiela yândi na mutu umubi, Satan, âsâna dinyânga muruma yândi.

Jean 3:3

Jésus âgâbusila yândi re: Nungiensa, mayâmbila yu re: Gâ mutu âsaburu diburu dimona, âsâkalâba bufumu buNsâmbi.

I Pierre 1:23

Yenu dimaburu diburu dimona sâ na batâyi bakafu, te nda na Tâyi yigáfu. Nâna ra nalonsa Mâmbu maNsâmbi mamonyu.

Ephésiens 2:1 na 6

Kâla yenu gândi dibila gâ bafumbi mu dyâmbu dimâmbu magâmanyi na mabi menu. Mane-nu nubila mu Jésus Christ, Nsâmbi ârâmbusa manenu nândi na âtsigisa manenu nândi gu yulu.

Colossiens 3:1

Yenu na Christ dirâmbusu gu difu mubébila monyu. Kâgu, bilânu na nsâla mâmbu magu yulu gukâtsâgali Christ va mabâga-la maNsâmbi.

I Pierre 2:24

Christ yâbena âbâga mabi menu mu nyuru ândi mu kurusu. Avâga nâna mure dibili gâ ba-

fumbi mu dyâmbu diuvâga mabi na mure dibili monyu muvâga mâmbu masungama. Yenu dimabeluga mumbâra yândi âtso-ga.

Galates 5:24

Babamu Jésus Christ bamâna boka matâsa mâwu makâla na nsálâwu yikâla.

Romains 6:2 na 11

Manenu diyi gâ bafumbi baba-sarungula ubévâga mabi. Tsenyi dikabégâbugila muvâga mâmbu magâmanyi? Yenu gândi, buedi mutâsa re: Diyî gâ bafumbi mu dyâmbu diubévâganga mabi. Diyî monyu mudyâmbu diJésus Christ muvâga naronda Nsâmbi.

MONYU UMUBU NA MUBU

Galates 6:8

Wotsu ukavâra mâmbu mayâbena, âkadila difu. Te wotsu ukavâra mâmbu maDinyunyi âkadila monyu umubu na mubu mu Dinyunyi Disungama.

Jean 3:14, 15

Gâ nasimbula Moïse nyoga mu tsengi yiyumuga, munóngu umosi ma, Muâna mutu, makasimbulu gândi mure wotsu ukabila na gitu mu ma, âkabila na monyu umubu na mubu.

Jean 17:3

Monyu umubu na mubu ra muyâba yu, ra Nsâmbi mosi pinsa yingensa, na muyâba ma usindugu nâgu.

Jean 3:36

Wotsu una gitu mu Muâna Nsâmbi, âna monyu umubu na mubu. Wotsu unábusa Muâna Nsâmbi âsâna monyu wena, te kâbu Nsâmbi yiva yulu ândi.

Romains 6:23

Futu mabi difu, te Nsâmbi âkâvegi monyu umubu na mubu mu Jésus Christ fumu etu.

Jean 5:24

Nungiensa, mayâmbila yenu re: Wotsu umayulu dufi diâmi na una gitu mu yândi usindiga ma, âna monyu umubu na mubu, Asâkavegu mbela. Abetsi gu difu, âmavioga gu monyu.

Esaïe 32:17

Yisâlu gimâmbu masungama
ra polu. Disukusulu dimo ra
ulooga nubila na murima usu-
nda mubu na mubu.

Galates 4:6

Mulonsa re: Yenu ra bââna
bândi, Nsâmbi âsindiga gu mi-
rima mietu Dinyunyi diMuânâ-
ndi. Dinyunyi diena âgonayâ-
mbila re: Tâta, Tâta.

Romains 8:16

Dinyunyi diNsâmbi yâbena
âgonatsigimisa gu manyunyi me-
tu re: Diyi bââna baNsâmbi.

Bââna bâmi, sâ buedi gâ diyâ-
mbila ka na muna re: Makâro-

ndi yu. Buedi dironda dietu dilâ-
bani mu mâmbu makâvâgi ma-
nenu. Dironda dingiensa. Ra nâ-
na dikayâba nungiensa re: Diyi
mu yimuânsa. Ra nâna mirima
mietu mikabila misunda va wusu
Nsâmbi. — I Jean 3:18, 19

Jean 14:21

Wotsu ukayulu bandongi bâ-
mi nukiela tsio, ra yândi ukâr-
ondi ma. Wotsu ukârondi ma,
âkarondu na Tâta. Makaronda
yândi na makayâbana nândi.

Dirungula uyâba re: Diyi mu
Nsâmbi na yândi âyi mu mane-
nu mumbâra âvega manenu Di-
nyunyi diândi. — I Jean 4:13

CHRIST NUTSAGALA NAGU AKAKONDI YINYUNGA

Jean 17:13

Namapâpa maguitsa gu yu.
Mamayâmbila mâmbu mena mu
tsengi yiyi mure yinyunga giâmi
gibili giginena mu yâwu.

Romains 14:17

Bufumu buNsâmbi sâ dyâmbu
diuyí vo diunu, te nda mâmbu
masungama, na polu na yinyu-
nga gikâvegi Dinyunyi Disunga-
ma.

Galates 2:20

Magomunu na Christ va ku-
rusu, te mayi monyu. Sâga ma
uyi monyu, te nda Christ uyi mo-
nyu mu ma. Mâmbu motsu ma-
nânavâga ma, makâvâgi mo na

gitu mu Muâna Nsâmbi. Yândi
ra uronda ma. Afu mu ma.

Esaïe 12:3

Yenu dikateganga mâmba na
yinyunga gu ditegulu dimonyu.

Jean 15:11

Mayâmbila yenu mâmbu me-
na mure yinyunga giâmi gibili
mu yenu. Yinyunga gienâ gika-
bila giginyi.

Psaume 16:11

Yikalonsa ma nsila yimonyu.
Guyi yinyunga giginena va wu-
su âgu. Mâmbu mana yinyunga
gimubu na mubu mayi va mbâ-
râgu.

I Samuel 12:15

Te yenu gâ dibusa yululu du-fi diNsâmbi Monyu na yenu gâ dibusa mâmbu maNsâmbi Mo-nyu, yândi âkabusa yenu nava busa yândi batâyi benu.

Romains 6:16

Yenu diyâtsi buedi re: Yenu gâ didyânsila mutu, yenu dikayululu yândi. Yenu ra baviga bayândi ukâyululu yenu — gâ nda mabi makâyensi bâtu gu difu, gâ nda mâmbu mamanyi makâlonsi bâtu mutsâgala buedi va wusu Nsâmbi.

II Thessaloniciens 1:7-9

Akavega polu gu manenu ba-digonalâba maguga. Dikalâba nâ-

na vakaruga Fumu etu Jésus na biâsa biândi. Yâwu bana bungu-du. Akaruga va ganagâra dilimi dimbâwu mukilisa babagáyâba Nsâmbi na babagáyululu mâmbu maFumu etu Jésus. Bakaki-lusu mubungana mubu na mubu gu vâla na Fumu etu na bungu-du buândi.

Deutéronome 11:26-28

Yuluânu, makasunsa va wusu enu namunyi miula na mulogu. Yenu gâ dikiela migiela miNsâmbi enu yiMonyu, yenu dikadila monyu. Magonalonsa yenu mio namunyi wuwu. Yenu gâ dibusa ukiela migiela miNsâmbi enu yi-Monyu, yenu dikalogu.

Philippiens 2:11

Buedi botsu bayâmbila re: Jésus ra Fumu nugitsa Tâta Nsâmbi.

Matthieu 10:29, 30

Mutu wotsu usâkaruna ma va wusu bâtu, masâkaruna yândi va wusu Tâta yigu yulu. Te wotsu ukabusa ma va wusu bâtu, makabusa yândi va wusu Tâta yigu yulu.

Romains 10:9, 10

Gâ yisinga na muna wâgu va wusu bâtu re: Jésus ra Fumu, gâ yina gitu gu murima wâgu re: Nsâmbi ârâmbusa yândi gu difu mubébila monyu, yikayobulu.

Mutu âkabila usungama mumbâra na murima wândi âka na gitu gu Nsâmbi. Mutu âkayobulu mumbâra na muna wândi âmasinga.

I Jean 2:23

Mutu ubusa muâna, âmabusa na tâyi gândi. Mutu uyâtsi muâna, âyâtsi na tâyi gândi.

Luc 9:26

Mutu wotsu ukalâba tsonyi mu ma na mu mâmbu mâmi, ma Muâna mutu gândi, makalâba tsonyi mu yândi vakaruga ma. Makaruga na biânsa bisungama na bundumba buâmi bukavegu ma na Tâta.

II Thessaloniciens 2:9

Koravâna mutu umubi âkaruga mu bungudu buSatan. Akavâga bimuila na bilimba biufura bimunóngu munóngu.

I Pierre 5:8

Diyâbila biolu. Rimbânu. Mukolitsi wenu, Dyâbara, âkâlegi bâtu munóngu umosi gâ magiena mubunga yâwu.

Matthieu 4:1 na 10, 11

Dinyunyi Disungama âruma Jésus muyenda gu tsengi yiyumuga mumângu na Dyâbara. Jésus âgâbusila yândi re: Burugavâna, Satan. Ditendu re: Buedi mugobisa ka Fumu âgu Nsâmbi na udyânsila yândi pinsa. Kora-

vâna Dyâbara âsiisa yândi. Biânsa baruga va mbârândi muyâmunâ yândi.

Bongânu biluâni biotsu bivegu manenu na Nsâmbi mure dirungula uguâra nubusa bikumbu biDyâbara. — Ephésiens 6:11

Actes 26:18

Manásindiga yu mure yidibili yâwu misu. Yikaburula yâwu gu divisama nuyensa yâwu gu yivelâ. Yikadumba yâwu gu dinyânga diSatan mugâbusa yâwu gu dinyânga diNsâmbi. Yâwu nubila na gitu mu ma, bakasingulu kokolu mu mabi mâwu. Bakadila yitsiga va ganagâra bâtu baNsâmbi.

UVIOGILILA SATAN

II Thessaloniciens 2:12

Fumu etu Jésus âkabunga mutu wena umubi na mufu wândi vakaruga yândi na yivela giginena.

Jacques 4:7, 8

Yululuânu Nsâmbi. Guârânu na Dyâbara âkarina yenu gu vâla. Gogulânu gu Nsâmbi na yândi âkagogula gu yenu.

Hébreux 2:14

Akâtsitsi yâwu re: Bââna. Bââna bana manyuru na malungu, kâgu Jésus yâbena âruga mubila mutu gâ yâwu. Avâga nâna mure vafu yândi, ârungula uburula dinyânga diDyâbara una bungudu budifu.

Romains 8:35 na 37

Ukayâgasana manenu na dironda diChrist nda nyi? Maguga marungula? vo nda pága yiyingena, vo nda muritsugu maguga, vo mulâba nsâla, vo mubila yi-vâsi, vo mulâba woma, vo nda difu? Mu mâmbu mena motsu dirungula uguârila mu bungudu buyândi ukârondi manenu.

I Jean 3:8

Wotsu ukabékonda vâga mabi, âka mutu uDyâbara, mumbâra Dyâbara âvâganga mabi ubânda va dibându. Ra dibându Muâna Nsâmbi âruga mukâra bisâlu biDyâbara.

I Corinthiens 13:1

Nisi matsayâba uyâmbila mu-
fi masusu na mabiânsa, gâ masâ-
na dingieba maka gâ pâmbu yi-
gonasigu ka nsolu.

I Jean 4:20

Mutu gâ âyâmbila re: Makâro-
ndi Nsâmbi na yândi âkâkoli
muâna nguândi, mutu wena ra
mufuritsi. Nungiensa âsâkarungu-
la uronda Nsâmbi ugálâba yândi
gâ âsagonaronda muâna nguândi
unálâba yândi makiesi motsu.

I Jean 3:14

Diyâtsi re: Dimaburugu gu di-
fu munyingana gu monyu mum-
bâra dikârondi bââna batâyi. Wo-
tsu ugâna dironda, âkika gu difu.

Jean 13:35

Gâ yenu dirondana yenu na
yenu, bâtu botsu bakayâba re:
Yenu dika bayikitsi bâmi.

Galates 5:22, 23

Mâmbu maDinyunyi Disunga-
ma ra ubila na dingieba, na yin-
yunga, na polu, na mirima digu-
mi, na giensa, na uyâmunana, na
ubila na muginyinyi, na usigama,
na ubusa diviosilila dimurima.

Jean 21:16

Akonda yubula re: Simon, yi-
muâna Jonas, yinânaronda ma?
Pierre âgâbusila yândi re: E, Fu-
mu, iyâtse re: Manâronda yu.
Jésus âyâmbila yândi re: Kiela
mandomba mâmi.

NARAMBUGA JESUS CHRIST

Actes 10:39-41

Yetu ra bimuenyi bimâmbu motsu mavâga yândi gu Jérusalem na gu tsengi yibajuifs. Yâwu baboka yândi nugomina yândi mu muiri. Nsâmbi ârâmbusa yândi gu difu mu wisi umureru. Vamamâna yândi urâmbuga gu difu, Nsâmbi âsingisa re: Alâbani sâ gu bâtu botsu te nda gu yetu bimuenyi bimâna solu na Nsâmbi. Alâbana netu badiyânga nândi na badinuanga nândi.

Vamâna Jésus urâmbuga gu difu va magielu mawisi tsonu, âregila lâbana na Marie, yimusi Magdala upusu démon tsâmbu nândi.
— Marc 16:9

Tsufu pombu nuvioga, bayikitsi bajesus babébila mu ndâgu, na Thomas âbila nâwu. Biâbutsu bibila bitsibugu. Jésus âruga. Alâbana va ganagârâwu. Ayâmbila re: Polu gu mbugenu. Vâna âyâmbila na Thomas re: Gogisa mulembu wâgu na vâva. Lâba makâka mâmi. Gogisa na dikâka diâgu gândi. Sunsa dio mu dibânsi diâmi. Yiyâbila na bapâga, te bila na gitu. Thomas âyâmbila re: Yira Fumu âmi. Yira Nsâmbi âmi. — Jean 20:26-28

Agâbu nufu mu dyâmbu dimabi metu. Agâbusu gu monyu mure dibili basungama va wusu Nsâmbi.
— Romains 4:25

Matthieu 16:21

Jésus âbânda ulonsa bayikitsi bândi re: Makayenda gu Jérusalem. Bivunda bibâtu na bivunda babakâyoki malâgu na babakâtendi mâmbu bakaritsiga maguga mambili. Makaboku. Makabérâmbuga gu difu mu wisi umureru.

Jean 5:25 na 28, 29

Mayâmbila yenu nungiensa re: Dikeisi dikoka bebala na dio dimaruga. Babafu bakayulu dufi dima, Muâna Nsâmbi, na yâwu babakayulu dio, bakabila na monyu. Diyâsimina mumbâra dikiesi dika bebala. Botsu babamu basongu bakayulu dufi diâmi. Ba-

kapula. Yâwu babavâga mama-nyi bakarâmbusu mudila monyu, te yâwu babavâga mabi bakarâmbusu muvegu mbela.

Romains 6:3-5

Yenu disayâba re: Manenu botsu badimabâtsu mubila umosi na Jésus Christ, dimabâtsu mubila nândi gu difu diândi? Kâgu, mubâtsu manenu dimaveru nândi gu difu, mure munóngu umosi narâmbusu Christ gu difu na bungudu bubunena buTâyandi, manenu gândi dirâmbusu mudila monyu umona. Gâ manenu diyi nândi gu difu diândi, dikabila nândi gândi varâmbuga yândi gu difu.

USUNGAMA VA WUSU FUMU

Luc 1:74, 75

Vakamâna yenu upunsulu bakolitsi benu, makasingisa yenu mudyânsila ma gugá woma na mubila bâtu basungama batsufu tsieu tsiotsu.

I Pierre 1:15

Yândi umatsitsa yenu âka usungama. Na yenu gândi bilânu basungama mu motsu makâvâgi yenu.

I Pierre 1:2

Yenu disolu kâla na Nsâmbi Tâyi mubila bândi mu bungudu buDinyunyi Disungama. Disolu muyululu Jésus Christ na mugungu na malúngu mândi.

II Corinthiens 7:1

Bawâyiânu, bandâgi tsiotsu tsina tsika na tsongu gu manenu. Ra dibându siisânu motsu makâbunsi na nyuru na murima. Vâgânu mâmbu masungama na muginyinyi nulâbanga Nsâmbi woma.

II Timothée 2:21

Gâ mutu yâbena âkakunsa murima wândi nusiisa mâmbu mena magâmânyi, âkabila uye lamina muvâga bisâlu bibinena. Fumu ândi ârungula umema mu yândi re: Aka na tsongu nâmi. Aka utsonsama mutsitsu muvâga bisâlu biotsu bibinyi.

Esaïe 35:8

Gukabila mumbâmba umune-na. Bakatsitsanga wo mumbâmba usungama. Mutu umubi nisi umosi âsâkavioga vâna. Nsilena yikabila yibasungama. Babakabonga nsilena, nisi babagána buyedi, basarungula uvâva.

Hébreux 13:12

Ra dibându Jésus gândi âfu mâ vâla na musengi mure âretsi bâtu na malúngu mândi.

I Jean 1:9

Gâ disinga mabi metu, yândi âyi umunyi na usungama musingila manenu kokolu na mugunga manenu mabi motsu.

Makâbâtisi yenu na mâmba muyâba re: Yenu dimakâlula buyedi. Te ukâyitsi âtsaviogilila ma. Va mbârândi mabila misu ka mu tsî. Yândi âkabâtisa yenu na Dinyunyi Disungama na mbâwu.

— Matthieu 3:11

Ephésiens 1:4

Nsâmbi nagi unékunsa tsengi âmâna sola manenu mubila bândi mu Christ, mure dibili basungama gugá mbela va wusu ândi.

Hébreux 12:14

Bilânu na muginyinyi mutsâgala na polu na bâtu botsu na mubila na bitsâgalitsi bisungama. Mutu âsâkalâba Fumu gugá bitsâgalitsi bisungama.

42 BATU BABABASU NA DINYUNYI DISUNGAMA

Luc 11:13

Rembusa yenu bâtu bababi diyâtsi uvega bivâva bïbinyi gu bââna benu. Tâta Nsâmbi âsâkabusa uvega Dinyunyi Disungama gu yâwu babakavonda yândi.

Actes 1:8

Te yenu dikadila bungudu vakanuga Dinyunyi Disungama gu yenu. Yenu dikabila bimuenyi diâmi . . .

Ezechiel 36:27

Makasunsa gu yenu Dinyunyi diâmi. Makavega yenu nsála mulânda mambu mâmi na mukiela migiela miâmi.

Romains 8:9

Te yenu disâkâlândi matâsa mamanyuru menu. Yenu dikâlândi Dinyunyi, mumbâra Dinyunyi diNsâmbi dikâtsâgali gu yenu. Wotsu ugâna Dinyunyi diChrist âsâ mutu wândi.

Actes 13:52

Bayikitsi gu Antioche babâsu na yinyunga na Dinyunyi Disungama.

Actes 4:31

Vamâna yâwu usâmbila, yitsiga gibila yâwu giregama. Yâwu botsu babâsu na Dinyunyi Disungama na bayâmbila mambu ma-Nsâmbi na bungudu.

Psaume 34:19

Fumu Nsâmbi âka yitsiga gimosi nâwu babana mirima mitsira. Akâyobuli yâwu babagonalâba pága mbili.

Esaïe 66:2

Nsâmbi Monyu yâre: Bivâva biotsu makâka mâmi matsavâga. Biotsu biyi vâna disina mu ma. Makatâsila nda banyi? Makatâsila mutu wotsu ugonalâba pága na wotsu una murima utsira.

I Pierre 4:12, 13

Wâyiânu, diyâgibama vakâlâbi yenu pága mbili nutâsa re: Ra dyâmbu digâyulunu. Lâbangânu unyi mumbâra yenu dimadugulu

mugâbana maguga maChrist. Koravâna gu mawusu yenu dikalâba yinyunga vakalâbana bufumu buândi.

Apocalypse 21:4

Nsâmbi yâbena âkabunsula matsânga mu misu mâwu. Difu disâkabébila. Gusâkabébila bako-ndu nisi ulila vo maguga. Mâmbu makâla makavu.

Psaume 37:3

Bila na gitu mu Nsâmbi Monyu nuvâga mâmbu mamanyi. Tsengi yika yâgu mutsâgala. Mu-yâba re: Nsâmbi âgomakiela ma ra munóngu umosi na muyí kura.

44 BANDAGI BANSAMBI GU BABAKAMANGU

Nsâmbi ukâvegi polu âsâkatsinga munyiga Satan gu tsî bio-ru bienu. — Romans 16:20

Hébreux 2:18

Namapâpa ârungula uyâmuna yâwu babagonamângu mumbâra yâbena âmângu na âlâba maguga.

Romains 8:28

Diyâtsi re: Nsâmbi âkâdyânsi mu mâmbu motsu mure babakârondi yândi babili buedi, na yâwu gândi babainatsitsu nagâna yândi.

I Corinthiens 10:13

Gusândi dimângu digámângu bâtu botsu. Nsâmbi âsâna nsugu. Asaronda r'e: Yenu dimângu uvigilila bungudu buenu. Vakâmâ-

ngu manenu, âkâvâgili manenu disuga mure dikaguâra.

Esaïe 43:2

Gâ yisâbuga mâmba, makabila nâgu. Nisi mâmba mamanena vo nyidu yisâkapula gu mbugâgu. Gâ yivioga gu mbâwu, yisâkalula nisi yisâkayulu mbâbala.

Psaume 34:20

Bâtu babanyi bakâlâbi maguga mambili te Nsâmbi âkâyâmuni yâwu mu motsu.

Mula gu mutu wotsu ukâguâri mu dimângu. Yâ nuguâra, âkavegu monyu nalâgana Nsâmbi ndâgi muvega gu botsu babakârondi yândi. — Jacques 1:12

Apocalypse 21:7

Yândi ukaguâra âkadila bivâva biotsu. Makabila Nsâmbi ândi. Yândi âkabila muânâmi.

Apocalypse 3:12

Wotsu ukaguâra âkabila gâ dikuti mu ndâgu Nsâmbi. Asâkabépula. Makatenda mu yândi nduga Nsâmbi âmi na nduga dímbu di Nsâmbi. Ra Jérusalem yimona yikasunda gu yulu. Na makatenda mu yândi ndugâmi yimona.

Apocalypse 3:5

Wotsu ukaguâra âkaduâra biduâri bifuga. Masâkaburula ndugândi mu mugânda umonyu. Va

wusu Tâta na va wusu biânsa biândi makayâmbila re: Wuwu ra mutu wâmi.

Apocalypse 3:21

Wotsu ukagâra naguâra ma, makasingisa yândi mutsâgala va mbârâmi mu yitsiga gibufumu buâmi. Mayi matsâgala va mbâra Tâta mu yitsiga gibufumu buândi.

Apocalypse 2:7

Wotsu una mâru, âyulu buedi nagonayâmbila Dinyunyi Disungama gu bisi dibundu. Wotsu ukaguâra makasingisa yândi muví milunda mimuiri umonyu gu nungi yiNsâmbi.

BANDONGI BANSAMBI MU DYAMBU DIUBOKA DYONGA

I Corinthiens 7:10, 11

Babayongu, Nsâmbi âronda re:
Mugâtsi âyâburuga na mulumi
ândi. Agâmaburugu na mulumi
ândi, âyâbéyongu na dibâgala di-
susu. Agâ na nsâla uyongu, ve-
ngu âgâbugi gu mulumi ândi. Sâ
buedi mulumi ârabusa mugâtsi.

Wotsu ubusa mugâtsi ândi nu-
yonga mususu, âkâvâgi butsuâri.
Wotsu uyonga mugâtsi umabusu
na mulumi ândi, âkâvâgi bu-
tsuâri.
— Luc 16:18

Mu dyâmbu dimugiela mugie-
tu umayongu âkatsâgala na mu-
lumi ândi vaki yândi monyu. Gâ

mulumi âmafu, âsândi du gu mu-
giela. Gâ mugietu wena âyongu
na dibâgala disusu gâ mulumi
ândi âki monyu, bakayâmbila re:
Amavâga butsuâri. Te gâ mulumi
ândi âmafu, mugiela usâkabébila
mu yândi. Arungula uyongu na
dibâgala disusu gugá vâga bu-
tsuâri.

— Romans 7:2, 3

Wotsu ukabusa mugâtsi ândi
ka nsolu gugâvâga yândi butsuâ-
ri, âyi munóngu umosi gâ mutu
umaruma yândi muvâga butsuâ-
ri. Mayâmbila yenu re: Wotsu
ukayonga mugietu umabusu na
mulumi ândi, ânâvâga butsuâri
nândi.

— Matthieu 5:32

Jacques 5:8

Sunsânu mirima mienu. Guârânu. Fumu etu âsâkatsinga nuruga.

Marc 8:38

Wotsu ukâlâbi tsonyi mu ma na mu mâmbu mâmi va wusu banga mabi babagána gitu mu Nsâmbi, ma Muâna mutu, makalâba tsonyi mumema yândi vakaruga ma na bundumba buTâta na biânsa bisungama.

Jean 14:3

Vakayenda ma, na gâ mama-mâna kunsila yenu bitsiga, makabéruga mubonga yenu, mure dikabila yitsiga gimosi.

Matthieu 24:30

Koravâna bâtu bakalâba yilimba gima Muâna mutu gu yulu. Bâtu bamalongu motsu bakalâba pága. Bakalâba ma Muâna mutu nakaruga ma va yulu dibungi na bungudu na bundumba.

Apocalypse 3:11

Masâkatsinga nuruga. Guâri-la mu motsu matsadila yu mure mutu ususu âkoradumba yilimba giâgu gibuvunda.

Matthieu 24:27

Muitsu uma, Muâna mutu ukabila munóngu umosi nakâluli mukâkâdi tselu na tselu.

I Jean 3:2

Wâyiânu, dikoka bââna ba-
Nsâmbi te nakabila manenu gu
mawusu disâmakunsa yâba. Di-
yâtsi re: Vakaruga Christ dikabi-
la gâ yândi mumbâra dikakunsa
lâba yândi.

Apocalypse 16:15

Yulu, makaruga munóngu gâ
muyibitsi. Dinyi gu yândi ukabi-
la utsonsama na ukakiela biduâ-
ri biândi. Akorayenda munyânga
nulâba tsonyi.

Luc 12:40

Na yenu gândi, bilânu baba-
tsonsama, mumbâra ma Muâna
mutu makaruga dikiesi digáyâba
yenu.

Actes 1:11

Bayâmbila re: Bisi Galilée, ye-
nu digonabemina gu yulu nda
mugi? Jésus ena utsamâka gu yu-
lu va ganagârenu, âkagâbuga. Na-
tsamâka yândi ra nakagâbuga
yândi.

Matthieu 16:27

Ma Muâna mutu makabéruga
na bumdumba buTâta na yivela
giginena na biânsa biâmi. Va di-
kiesi diena mutu mutu âkavegu
ngu natsadyânsa yândi.

Luc 21:27

Koravâna bakalâba ma Muâ-
na mutu. Makaruga va yulu di-
bungi na bungudu na bundumba
buviogilila.

MAMBU MANSAMBI

Psaume 119:11

**Makâkieli mâmbu mâgu gu
tsi murima wâmi mure makora-
vâga dibi.**

Luc 21:33

**Yulu na tsi bikavu, te mâmbu
mâmi masâkavu nisi pesu.**

Matthieu 22:29

**Jésus âgâbusila yâwu re: Yen-
nu disanâtâsa buedi. Yenu disâ-
kâyulu mâmbu matendu mu
Mabâka. Na yenu disayâba bu-
ngudu buNsâmbi.**

II Pierre 1:21

**Sâga na dironda dimutu mâ-
mbu mayâmbulu gu babigitsi, te
nda mu bungudu buDinyunyi**

**Disungama. Mu bungudu buâ-
ndi babigitsi babilia bikâmbi bi-
Nsâmbi gu bâtu.**

II Timothée 3:16

**Mâmbu maNsâmbi motsu
matendu mu bungudu buNsâ-
mbi. Tsongu yimo ra mulonsa
bâtu, na mutsukiga mirima mi-
bâtu, na musungiga bâtu, na
mulonsa mâmbu masungama.**

Psaume 119:105

**Mâmbu mâgu ra lâmbi mulo-
nsa bioru biâmi nsila. Ra yivela
mulonsa ma nsila.**

**A Fuma Nsâmbi, mâmbu
mâgu maka mubu na mubu gu
yulu!**

—Psaume 119:89

This booklet is published as the Lord provides the means in more than 145 languages for free distribution to people EAGER to read. If you can use more copies for prayerful distribution, write to the publisher in English, telling how many you need and in what languages. Published by:

WORLD MISSIONARY PRESS, Inc.
P.O. Box 120
New Paris, Indiana 46553 U.S.A.

Gebon

SNQ
Sangj
Yissangou